

08/09/2003

Bapa 10 anak berkayak untuk Dr Mahathir

KUALA PILAH: Seorang bapa 10 anak, Ku Mohd Fozi Ku Husain, 52, bercadang berkayak secara solo menyusuri pantai Semenanjung dari Kelantan ke Perlis mulai 1 Oktober ini sebagai hadiah kepada Perdana Menteri, Datuk Seri Dr Mahathir Mohamad, yang akan bersara bulan depan.

Ku Fozi menetapkan sasaran berkayak selama 22 hari sempena 22 tahun Dr Mahathir menjadi Perdana Menteri dan bercadang memulakan ekspedisi itu dari Tambatan Diraja Sungai Kelantan, Kota Bharu melalui Selat Tebrau di Selatan dan memasuki Selat Melaka ke Kuala Perlis, di utara Semenanjung.

Pelukis bebas dari Rumah Rakyat Pekan Johol, dekat sini itu berkata, ia adalah hadiah istimewa untuk Dr Mahathir.

"Sebagai rakyat biasa, tidak ada sebarang hadiah atau sumbangan yang dapat saya berikan kepada Dr Mahathir yang berjaya membawa rakyat dan negara ini mencapai kejayaan. Saya sudah menulis surat kepada beberapa pihak termasuk Polis Diraja Malaysia (PDRM) dan Jabatan Laut bagi membantu saya dalam ekspedisi ini," katanya yang berasal dari Arau, Perlis.

Ku Fozi berkata, beliau mendapat dorongan Ahli Dewan Undangan (Adun) Johol yang juga Pengerusi Jawatankuasa Kerja Raya dan Perhubungan, Datuk Darus Salim Bulin dan Pergerakan Pemuda Umno, Perlis.

Katanya, kertas kerja ekspedisi sudah dikemukakan kepada Kementerian Belia dan Sukan bagi mendapatkan tajaan tetapi belum mendapat sebarang jawapan.